

Rute rekokue oĩa Rute rekokue oĩa

“Joguerekaoa kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve” (1.1). Ha'e rami ijypy kova'e kuaxia para. Moabe yvy re ava va'e omano, ta'y kuery avi. Ha'e ramo ta'yxykue Noemi hery va'e ojevy ju Belém tetã py. Hexeve ou avi peteĩ ipi'a ra'yxykue Rute hery va'e, Moabe pygua. Ha'e va'e ma oayvu ete ome xykue'i, Nhanderuete anhetẽ va'e re ojerovia guive oikovy.

Belém tetã py oiko jave peteĩ ava heko porã va'e ogueraa gua'yxyrã, Boaz hery va'e. Ha'e rami vy Rute ma huvixa Davi jaryi, ha'e Jesus Cristo jaryi guive oiko raka'e.

Ha'e jave py heko vai va'e heta ikuai teĩ Rute rami ikuai avi yvyigueve'i ojerovia ete va'e. Ha'e va'e kuery ma Nhanderuete omoingo porã.

Moabe yvy gui Noemi ha'e Rute ojevyague

¹ Joguerekaoa kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve.

² Ha'e va'e ava ma Elimeleque hery va'e, ha'e rã ta'yxy ma Noemi. Ta'y kuery ma Malom ha'e Quiliom. Efrateu kuery ikuai Judá regua Belém py

hekoa va'e. Moabe yvy re ha'e kuery ovaẽmba vy hekoa ha'e py.

³ Ha'e gui ma Noemi me Elimeleque omano. Ha'e rã kunha va'e ha'e anho opyta mokoĩ opi'a reve.

⁴ Ha'e gui mokoĩve omenda Moabe pygua kuhnague re. Ta'yxy kuery regua peteĩ rery ma Orfa, ha'e rã amboae ma Rute. Ha'e rami vy ha'e py ikuai dez ma'etõ rai'i.

⁵ Ha'e gui mokoĩve ipi'a Malom ha'e Quiliom omano avi. Ha'e rami vy kunha va'e ha'e anho'i opyta, ipi'a kuery mokoĩve ha'e ime ndoikovevei ma rire.

⁶ Ha'e gui kunha va'e oendu SENHOR ojeupegua kuery re ima'endu'a vy ho'u va'erã ojou uka jevya. Ha'e rami vy opa'i ra'yxykue reve opu'ã jogueravy Moabe yvy gui ojevy aguã.

⁷ Ha'e ramo opa'i ra'yxykue mokoĩve reve oje'oi ikuaiague gui. Mboapyve oguata jogueravy, Judá yvy katy ovaẽ aguã.

⁸ Ha'e gui ma Noemi aipoe'i ha'e kuery pe:

— Tapeo, pejevy ju peteĩ-teĩ pendexya py. Tove SENHOR tapenemboaxy, omano va'ekue peẽ pemboaxyague rami, ha'e xevy voi.

⁹ Tove SENHOR tapenembovy'a, peteĩ-teĩ penemerã ro py — he'i. Ha'e vy oayvupa.

Ha'e rami rã ha'e kuery ojae'o atã.

¹⁰ Ha'e rami vy ime xykue pe aipoe'i:

— Any, ore voi roo avi 'rã nderupive neretarã kuerya katy.

¹¹ Ha'e rã Noemi aipoe'i:

— Pejevy ke, xememby kuery. Mba'erā tu peo ta xerupive? Xee nda'u areko teri ri xerye py xepi'a penemerā?

¹² Pejevy ke, xememby kuery. Tapeo ke, mba'eta xeguaimi'i ete ma amenda jevy aguã. Xee ma "Aendu teri arõ aguã" ha'e va'e rire, ha'e rami e'ÿ vy kova'e pytû re xemerã ajou vy xememby voi va'e rire ma

¹³ pearõ 'rãgue ri ty'y ha'e kuery tujapa peve? Imeve'ŷ va'e teri 'rãgue ri ty'y peiko? Any teve, xe-memby kuery. Mba'eta pendere vy xee xeporiauvaipa tei, xerovai SENHOR opo oupi rire — he'i.

¹⁴ Ha'e ramo ha'e kuery teīgue ju ojae'o atā
okuapy. Orfa ma peteīgue oayvu reve oxarura ovv
ome xykue pe. Ha'e rā Rute ma oikuavā ratā tema
oiny.

15 Ha'e ramo Noemi aipoe'i ixupe:

— Ne'exa, neirū ojevy ma ovy guetarā kuery ha'e nguuete kuerya katy. Ejevy ke ndee voi neirū rakykue.

16 Ha'e rā Rute ombovai:

— Ejeja uka eme xevy, xejoko eme guive
nderupive aa aguã. Mba'eta mamo rã reoa py rei
xee aa avi 'rã, ha'e mamo rã rekea py xee voi ake
'rã. Neretarã kuery ma xeretarã kuery ae avi 'rã
ikuai, ha'e Nderuete pe ma "Xeruete" ha'e avi 'rã.

¹⁷ Mamo rã remanoa py xee amano avi 'rã, ha'e py ae 'rã xenhono porãa. Ha'e gui tove SENHOR tax-emoingo axy ha'e oikuua rami, xapy'a rei ndegui mba'emo pe ajep'e a uka ramo, manoa e'ý vy — he'i.

¹⁸ Ha'e ramo Noemi ngupive ooxe etea oexa vy nonhea'āvei ojevy aguā.

19 Ha'e rami vy jogueraa mokoīve Belém peve.

Ha'e py ovaẽ ramo tetā pygua kuery onhemondyipa rei okuapy ha'e kuery oexa vy. Ha'e vy kunhague ma aipoe'i okuapy:

— Peva'e e'ŷ teve Noemi?

20 Ha'e ramo ombovai:
— Xevy pe “Noemi” pejeve eme, ha'e rã “Mara” peje xevy, mba'eta Ipo'akapa va'e ha'e rami ete xemoingo axy rire.*

21 Arekopa reve apy gui aa va'ekue ri SENHOR ojapo xeporiaukue'i reve ajevy aguã rami. Mba'e re tu “Noemi” peje xevy, xerovai SENHOR onhemoĩ ramo, Ipo'akapa va'e xembojexavai rei rire? — he'i.

22 Ha'e rami py Noemi ojevy Moabe yvy gui, opi'a ra'yxykue Moabe pygua Rute reve. Cevada omono'õa ypy'i jave ovaẽ Belém py.†

2

Cevada ra'yigue 'are Rute ojeupe guarã omono'õague

1 Ha'e gui peteĩ ava oiko Noemi me rãgue'i retarã oguerekopa va'e. Ha'e va'e ma Elimeleque retarã, Boaz hery va'e.

* **1:20** Tery Noemi ma “Iporã va'e” 'ea. Ha'e rã tery Mara ma “Haxy va'e, iro va'e” 'ea (Êxodo 15.23). † **1:22** Israel kuery yvy py ma mba'emo ra'yigue omono'õ 'rã abril ha'e maio py. Cevada ranhe 'rã omono'õ, ha'e gui trigo ju. Po rami 'rã omono'õ. Hi'y ma avakue ojaya rire kunhague hakykue oo vy ojokua 'rã. Ha'e gui oo ju 'rã ndojokuapai va'ekue ojopy vy. Ha'e gui mae ma ogueraa 'rã ojyky aguã py. Vaka omopyrõ vy 'rã ojyky, ha'e'ŷ vy hi'áry rupi mba'emo ipoyi va'e omoatã 'rã heruvy, e'ŷ vy karóxa omboguata reve. Ha'e gui omboveve 'rã, ha'e oiky'a'o ju 'rã omboyrú aguã.

2 Ha'e gui Moabe pygua Rute aipoe'i Noemi pe:

— Taa nhomba'ety rupi taiko, xemboaxy'i va'e rakykue rupi rei aa vy cevada ra'yīgue 'are amono'ō aguā.

Ombovai:

— Tereo ha'vy, xememby — he'i.

3 Ha'e gui Rute nhomba'ety py oo vy omono'ō oikovy omono'ō va'e kuery rakykue rupi. Elimeleque retarā Boaz mba'ety py guive oo.

4 Ha'e jave py ae Boaz ou Belém gui. Ha'e rami vy guembiguai kuery omono'ō va'e pe oxarura:

— SENHOR toiko peẽ kuery reve.

Ha'e kuery ombovai:

— Ndee voi SENHOR tanemoingo porā — he'i okuapy.

5 Ha'e gui Boaz oporandu guembiguai kuery re opena va'e pe:

— Mava'e rajy tu pe kunha va'e?

6 Hembiguai ombovai:

— Pe kunha va'e ma Moabe pygua, Noemi reve Moabe yvy gui ou va'ekue.

7 Ha'e va'e ma ange xevy aipoe'i: “Tajopy ha'yīgue, tamono'ō avy omboaty pyre pa'ū rupi omono'ō va'e kuery rakykue rupi”, he'i vy ou kuri. Ko'ēmba'i ramove koropi ae oiko aŷ'i peve, xapy'a'i opytu'u oguy py guive — he'i.

Rute reve Boaz ijayvu porā'ague

8 Ha'e gui Boaz aipoe'i Rute pe:

— Endu ke, xerajy. Tereo eme mba'ety mboae py remono'ō vy, apy gui tereove eme. Apy ae 'rā reiko xerembiguai kunhague reve.

9 Rexa pota 'rā cevada mono'õa kuery ombo'eapoa re, hakykue rupi reo aguã. Xerembiguai kuery pe xeayvu ae ma ndere opena rei e'ŷ aguã. Ndey'uvei vy tereo yryru oĩa py, ha'e ey'u xerembiguai kuery ojara va'ekue — he'i.

10 Ha'e ramo kunha va'e ngova omovaẽ yvy re. Ha'e vy aipoe'i:

— Mba'ex'a'vy tu xepytyvõ 'rā, amboae tekao guigua aiko va'eri?

11 Boaz ombovai vy aipoe'i:

— Xevy omombe'ua porã neme omano rire ixykue pe rejapo porãague. Mba'eta nderu, ndexy ha'e yvy ndetui'ague reja vy peteĩve reikuaa e'ŷ va'e kuerya py reju va'ekue.

12 SENHOR tomboekovia joupe rejapo porãague. Tove SENHOR Israel kuery ruete gui toupa ndevy guarã ha'e javi, ipepo guýry renhemi aguã reju rire — he'i.

13 Ha'e ramo kunha va'e aipoe'i:

— Xeruvixa, ndee xepytyvõ vaipa ma. Xembopy'a porã xee nerembiguai py'a re peve guarã ndeayvu vy, xee nerembiguai regua ndaikoi va'eri — he'i.

14 Ha'e gui okarua jave ju Boaz aipoe'i ixupe:

— Enhemboja ke kyvõ katy, ekaru einy mbojape re, vinho reve — he'i. Ha'e ramo omono'õ va'e kuery reve oguapy oiny. Ha'e rā ixupe ome'ẽ ha'yigue mbixy. Ixupe ome'ẽ retave ramo okaru porã, hevyatã peve.

15 Ha'e gui kunha va'e ha'yigue oekave ju aguã opu'ã ramo Boaz peteĩgue ju ijayvu guembiguai kuery pe. Ha'e vy aipoe'i:

— Tove tomono'õ pemboaty va'ekue ikuiaia rupi voi, pendeayvu eme ixupe.

16 Peity-ityve tema upe py pemboaty va'ekue gui, tove ta'ikuai ojopy aguã. Pendevai eme ixupe — he'i.

17 Ha'e gui mba'ety rupi kunha va'e omono'õ oikovy ka'aru peve. Omono'õ va'ekue ojyky vy oexa rã peteĩ ajaka renyẽ rai'i cevada oĩ.

18 Ha'e va'e oupi heravy tetã katy. Ha'e ramo ime xykue oexa omono'õ va'ekue. Ha'e ramo okaru okuapy jave guare rembyre voi oguenoẽ vy ome'ẽ avi ome xykue pe.

19 Ha'e rami rã ime xykue aipoe'i ixupe:

— Mamo tu remono'õ ange? Mamo tu remba'eapo ra'e? Ta'ima'endu'a porãa nepytyvõ vy nemovaẽ porãare re!

Ha'e ramo ome xykue pe Rute omombe'u mamo pa ombo'eapoague. Ha'e vy aipoe'i:

— Mba'ety amba'eapoa va'e ja rery ma Boaz — he'i.

20 Ha'e ramo Noemi aipoe'i opi'a ra'yxykue pe:

— SENHOR tomoingo porã, mba'eta ndojepe'ai jaikove va'e ha'e omano va'ekue omboaxy oikovya gui. Ha'e va'e ava ma peteĩ nhanderepya regua oiko — he'i.*

21 Ha'e ramo Moabe pygua Rute aipoe'i:

* **2:20** Ha'e kuery reko rami vy hetarã ae'ive va'e pe “Nhanderepya” he'i 'rã. Ha'e va'e ma ojogua ju 'rã guetarã yvy operde va'ekue (Levítico 25.25), opena 'rã guetarã iporiaukue'i re (Levítico 25.35), ojogua ju 'rã guetarã escravo-rã ogueraa pyre (Levítico 25.47-49), oepy 'rã guetarã ojukaague re (Números 35.19), ha'e omenda 'rã guyvy rembirekokue re imemby va'e'ŷ teri ramo (Deuteronomio 25.5-10). Ha'e gui nhande kuery repya ma Jesus ae (Gálatas 4.5, Tito 2.14).

— Ha'e va'e ma xevy “Xerembiguai kuery reve ae 'rā reiko ha'yīgue omono'ōmba peve”, he'i avi.

22 Opi'a ra'yxykue Rute pe Noemi ombovai:

— Xememby, ha'eve ete 'rā hembiguai kunhague reve reiko aguã, amboae kuery mba'ety rupi reiko axy 'rāgue py — he'i.

23 Ha'e rami vy Boaz rembiguai kunhague reve kunha va'e omono'ō oikovy cevada ha'e trigo omono'ōmba peve, ha'e ome xykue'ia py oke jepi oikovy.

3

Mba'emo moa'yīaty py Boaz oña py Noemi omon-doukaague

1 Ha'e gui ime xykue Noemi aipoe'i ixupe:

— Xememby, nda'evei ri ty'y nemerā xee ajou aguã revy'a aguã?

2 Ne'ixa, Boaz ma nhanceretarā oiko, guembiguai kunhague reve nemoingo va'ety guive. Ma'ē, kova'e pyávy ojyky 'rā mba'emo moa'yīaty py.

3 Ejau ke, enhemoeakuã ha'e emoñ ndeao iporāve va'e. Ha'e vy tereo mba'emo moa'yīaty py. Va'eri ava va'e okaru ha'e oy'u e'ŷ teria ja ejekuaa ukaeme ta'vy ixupe.

4 Ha'e gui oke ta ma ramo reikuua pota 'rā mamo pa onhenoa re. Ha'e gui reo avi 'rā ha'e py. Eipe'a inhovā ipy gui, ha'e enheno avi ha'e py. Ha'e gui ma ava va'e omombe'u 'rā rejapo va'erā.

5 Rute ombovai:

— Xee ajapopa 'rā ndeayvuague — he'i.

Rute re Boaz omenda aguã re ijayvuague

6 Ha'e rami rā mba'emo moa'yīaty py oo vy ojapo ime xykue ijayvuague ha'e javi.

7 Ha'e rami vy Boaz okaru ha'e oy'upa ma vy, ha'e opy'a py ov'y'a ete oiny reve oo onheno ha'yīgue omboaty pyre yvy'iry, ha'e ramo kunha va'e onhemboja mbeguei'i vy oipe'a inhovā ipy gui. Ha'e vy onheno avi oupy ha'e py.

8 Pytū mbyte jave ava va'e onhemondyi. Ovy vy oexa rā peteī kunha va'e ipy rupi onheno oupy ra'e.

9 Ha'e vy aipoe'i:

— Mava'e tu ndee?

Ombovai:

— Xee ma nerembiguai Rute. Eipyo ke nde-capa xee nerembiguai áry, mba'eta ndee ma oreptyvōarā reiko — he'i.*

10 Ha'e ramo aipoe'i:

— Xerajy, SENHOR tanemoingo porā. Jypy joupe rejapo porāague gui aŷ xevy rejapo va'e iporāve ete, mba'eta kunumigue rakykue rupi ma ndereoi, iporiaukue'i e'ŷ vy oguerekopa va'e rakykue rupi voi.

11 Ha'e gui aŷ ma xerajy, ekyje eme. Ndeavua ha'e javi'rā ajapo, mba'eta tetā py xeretarā kuery ikuai va'e ha'e javi oikuua ndee kunha heko porā va'ea.

12 Ne'ixa, anhetē ete xee penepytyvōarā aiko va'eri penepytyvōarā mboae oiko avi xegui peneretarā ae'ive va'e.

13 Epyta apy kova'e pytū re. Ha'e gui ko'ẽmba'i jave xapy'a rei ha'e va'e nepytyvōxe vy ha'eve nepytyvō aguā. Ha'e rā nanepytyvōxei ri ramo anhetē ete

* **3:9** Hexe omendaxea rami ijayvu ojejavy e'ŷ re, ha'e kuery reko rami vy.

SENHOR oikove va'e rery rupi aura vy aipoa'e: Xee ae 'rā roipytyvō. Enhenove ranhe ejupy ko'ẽmba peve — he'i.

14 Ha'e rami rā ipy rupi onheno oupy ko'ẽmba peve. Aje'ive'i reve opu'ã ov y joexa kuaa e'ŷ re teri, ava va'e

— Toikuua eme kunha va'e mba'emo moa'yīaty py ouague — he'i ramo.

15 Ava va'e aipoe'i avi:

— Eupi xevy ajukue renheovāa va'e, ejopy imoiny — he'i. Kunha va'e oupi ma ramo omonyē mboapy meme ryru cevada ra'yīgue. Ikupe áry oupi ma ramo oo ju tetā katy.

16 Ome xykue ro py ovaẽ ramo ixupe oporandu:

— Xememby, mba'e pa oiko ra'e?

Ha'e ramo omombe'u ava va'e ixupe ojapo porāague ha'e javi.

17 Aipoe'ive ju:

— Kova'e cevada ra'yīgue mboapy meme ryru ome'ẽ xevy, mba'eta aipoe'i: "Mba'eve reraa e'ŷ re ejevy eme teri neme xykuea katy", he'i va'ekue.

18 Ha'e ramo Noemi aipoe'i ixupe:

— Xememby, earõ ke, mba'e pa oiko 'rāa jaikuaa peve. Mba'eta ha'e va'e ava ma ndopytu'ui 'rā kova'e árave ha'e nunga re oikuaa pota e'ŷ re.

4

Rute re Boaz omenda aguã re jogueroayvuague

1 Ha'e gui tetā kora rokē py Boaz oo vy oguapy oiny ha'e py.* Ha'e rami vy oexa oiny hetarā pytyvõa mboae ijayvuague va'e oaxa rã. Ha'e va'e pe Boaz aipoe'i:

— Xeretarā, eju apy, eguapy ke — he'i ramo ha'e va'e ojere vy oguapy oiny avi ha'e py.

2 Ha'e ramo Boaz oenoī dez avakue tetā pygua nhomongoeta va'ety ikuai va'e. Ha'e kuery pe aipoe'i:

— Peẽ voi peguapy ke apy — he'i ramo oguapy avi okuapy.

3 Ha'e gui guetarā oipytyvõ aguã rami oiko va'e pe ju aipoe'i:

— Ha'e gui nhanderyke'y Elimeleque yvykue ma ta'yxykue ovendea va'erā itui, Noemi Moabe yvy gui ojevy va'ekue ae 'rã ovendexe.

4 Ha'e nunga rupi xee anhembopy'a ndevy amombe'u aguã. Ha'e rami vy nhanceretarā kuery apy oguapy okuapy va'e renonde aipoa'e ndevy: Ejogua na ha'e va'e yvy. Rejoguaxe ri vy ejogua. Ha'e rã any ri vy emombe'u porã xevy aikuaa aguã, mba'eta amboae ipytyvõara ndoikoi ndee e'ŷ vy, ha'e ndee rire ma xee ju aiko — he'i.

Ombovai:

— Xee ma ajogua 'rã — he'i.

5 Ha'e gui Boaz aipoe'ive ju:

* **4:1** Ha'e jave py ma huvixa kuery mba'emo re oikuua pota vy oo 'rã tetā rokē py, tetā rokē yvýry oguapy 'rã okuapy jogueroayvu aguã. Ha'e rami vy amongue mba'emo oguereko va'e oo 'rã tetā rokē py huvixa kuery oikuua pota aguã (Deuteronômio 21.18-19; 2 Samuel 15.1-4, 19.8; Jó 29.7-12; Proverbios 31.23; Jeremias 38.7-8, 39.3).

— Ha'e rami avi Noemi po gui yvy rejoguaa ára ma Moabe pygua imeve'ŷ va'e Rute gui avi 'rā rejogua, hexe remenda ramo ndera'y oiko va'era pe ime yvykue opyta aguã hery py — he'i.*

⁶ Ha'e ramo ojogua ta va'ekue aipoe'i:

— Ha'e rami ri ramo xee ma nda'evei ajogua aguã, amokanhy e'ŷ aguã xera'y kuery peguarã ae mba'emo areko va'e ha'e javi. Ejogua ndee ae ajogua 'rā va'ekue, xee ajogua aguã nda'eve reguai ramo — he'i.

⁷ Po rami ae yma rupi Israel kuery reko, amongue mba'emo ovende, e'ŷ vy omboekoviaa py. Ha'e va'e oikuaa uka porã aguã ma omboi 'rā opy ryru, ha'e ijoguaa pe ome'ẽ 'rā. Ha'e rami py oikuaa pavẽ 'rā omboekoviaague, Israel kuery reko rami vy.

⁸ Ha'e rami rā hetarã oipytyvõ aguã rami oiko va'e Boaz pe “Ndee ae ejogua” he'i vy omboi opy ryru.

⁹ Ha'e ramo Boaz aipoe'i nhomongeta va'ety ha'e guetarã kuery ha'e javi pe:

— Kova'e ára pexa pavẽa py Noemi po gui ajogua mba'emo Elimeleque, Quiliom ha'e Malom ougereko va'ekue ha'e javi.

¹⁰ Ha'e xera'yxyrã araa avi Malom ra'yxykue Moabe pygua Rute, herykue py xera'y oiko ma ramo ixupe guarã yvy opyta aguã, Malom rerykue re hexegua kuery ha'e tetã rokẽ py onhemboaty va'e hexarai e'ŷ aguã. Ha'e nunga rexaare ma peẽ kuery ae pendekuai aŷ — he'i.

¹¹ Ha'e ramo nhomongeta va'ety kuery ha'e okẽ py ikuai va'e ha'e javi aipoe'i:

* ^{4:5} Deuteronomio 25.5-10

— Ore kuery ma roexa ri. Ha'e ramo ha'e va'e kunha ndero py reraa va'erā ma SENHOR tomoingo porā Raquel ha'e Lia omoingoague rami, mba'eta ha'e va'e mokoīve omboetave raka'e Israel kuery. Ha'e gui ndee Boaz voi tanemboetea Efrata py, nderery re ta'ima'endu'aa pavē Belém tetā py.

¹² Ndero pygua kueryrā ta'ikuai Judá ra'y Perez, Tamar pi'a va'e ro py ikuiaia rami, nderayxy rupi nderayxy kueryrā SENHOR ome'ē va'erā ha'e javi.

Rute opi'a Obede oikuavā'iague

¹³ Ha'e gui Boaz ogueraa Rute gua'yxyrā. Hexeve joguereko ramo ixupe SENHOR ome'ē oguereko'i aguā. Ha'e rā oikuavā'i ava'i.

¹⁴ Ha'e ramo Noemi pe kunhague ikuai va'e aipoe'i:

— SENHOR toiko ima'endu'a porāmby, mba'eta kova'e ára nome'ē e'ŷi neremiarirō nepytyvōarā. Tove ha'e va'e rery re ta'ima'endu'aa pavē Israel kuery ikuiaia rupi.

¹⁵ Ha'e va'e ma nembopy'a porā ju 'rā nderekove pukukue re, ha'e nembopy'a porā 'rā neguaimi'i ma jave tei, mba'eta ndepi'a ra'yxykue nderayyu va'e oikuavā'i ma. Ha'e va'e kunha ma sete ndepi'a kuery oiko 'rā va'ekue gui ovareve va'e ndevy — he'i.

¹⁶ Ha'e ramo guamiarirō ava'i Noemi ojopy vy omoī o'u áry, hexe opena oikovy guive.

¹⁷ Hoo katy'i rupi ikuai va'e omboery okuapy.

— Oiko ma peteī ava'i Noemi remiarirō — he'i vy omboery Obede. Ha'e va'e ma Jessé ru, ha'e Jessé ma Davi ru raka'e.

¹⁸ Po rami ma Perez ramymino kuery rery:
Perez ra'y ma Hezrom,
¹⁹ Hezrom ra'y ma Rão, Rão ra'y ma Aminadabe,
²⁰ Aminadabe ra'y ma Naassom, Naassom ra'y ma
Salmom,
²¹ Salmom ra'y ma Boaz, Boaz ra'y ma Obede,
²² Obede ra'y ma Jessé, ha'e rã Jessé ra'y ma Davi.

Nhanderuete ayvu iky'a e'ŷ va'e New Testament in Guarani, Mbyá

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guarani, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

3309fa3b-7590-5ae9-b829-5df4ddfbf957